



EUSKAL AUTONOMIA ERKIDEGOKO INDUSTRI INGENIARIEN KONTSEILUA
CONSEJO DE INGENIEROS INDUSTRIALES DEL PAIS VASCO

EUSKAL AUTONOMIA ERKIDEGOKO INDUSTRIA INGENIARITZAREN KONTSEILUA

ESTATUTUAK

1. artikulua.— Izaera eta izena.

Euskal Autonomia Erkidegoko Industria Ingeniaritzaren Kontseilua, aurrerantzean Kontseilua, zuzenbide publikoko korporazio profesionala da, nortasun juridiko propioa du eta erabateko ahalmen juridikoa du, publiko zein pribatua, bere xedeak betetzeko eta bere eginkizunak burutzeko.

2. artikulua.— Araudi ezargarria.

Kontseilua tituludun lanbideei eta profesionalen elkargo eta kontseiluei buruzko 18/1997 Legeak, azaroaren 21ekoak, profesionalen elkargoei eta kontseiluei eta tituludun lanbideen erregistroaren araudiari buruzko 21/2004 Dekretuak, otsailaren 3koa, eta Estatutuotan xedatutakoak arautzen dute. Hala ere, ezargarriak zaizkion goragoko mailako arauen menpe ere badago.

3. artikulua.— Lurralde-eremua

Kontseiluaren jarduteko lurralde eremua Euskal Autonomia Erkidegoa da, hain zuzen ere, Araba, Bizkaia eta Gipuzkoako Industria Ingeniaritzaren Elkargoen jardun-eremuen batura.

4. artikulua.— Helbidea.

Kontseiluaren helbidea Lehendakaritza kargua betetzen duen Dekanotzaren Elkargoak duen helbidea da.

5. artikulua.— Xedeak.

Kontseilua da Araba, Bizkaia eta Gipuzkoako Industria Ingeniaritzaren Elkargo Ofizialak koordinatzen dituen organoa. Beraz, bere azken xedea kideek beren lanbidea zuzen betetzen dutela zaintzea da, herritarren eskubideak bermatzeko, baita industri ingeniaritza Euskal Autonomia Erkidegoan eta goragoko beste eremuetan ordezkatzeko eta defendatzeko ere, gizartearen interesekin eta beharrian orokorrekin bat.

6. artikulua.— Eginkizunak.

1.— Kontseiluaren eginkizunak dira:

a) Kontseiluaren eskumenen barruan industri ingeniaritzako jarduna arautzea eta elkargoek ondo funtzionatzen dutela zaintzea dago, eta horien ekintzen aurka jartzen diren errekursoak ebaztea, bai eta horien funtzionamenduari buruzko kexak ere.

- b) Euskal Autonomia Erkidegoko Administrazioak dituen arau proiektuen berri ematea, ingeniari lanbideari, elkargoei eta Kontseiluari berari eragiten badiote.
- c) Industria-ingeniartzaren deontologia arauak egin eta aldatzea.
- d) Elkargoen artean sortzen diren auziak arbitraje bidez ebaztea.
- e) Diziplinazko ahala erabiltzea, indarrean dagoen araudiaren eta elkargoetako estatutuen arabera.
- f) Kontseiluaren estatutuak onetsi eta aldatzea, baita elkargoen estatutuei eta horien aldaketei buruzko halabeharrezko txostenak ematea ere.
- g) Kontseiluaren aurrekontua eta urteko kontuak onestea, eta Elkargo bakoitzak Kontseiluko gastuetarako eman beharreko kopurua ezartzea.
- h) Elkargoekin elkarlanean aritzea, lan, prestakuntza, laguntza, kultura, eta lankidetzak jarduerak antolatzeke, baita industri ingeniartzarako komenigarria izan daitekeen antzeko beste edozein jardura antolatzeke ere. Horretarako, Kontseiluak erakundeak edo zerbitzuak sortu eta bultzatu ahal izango ditu, eta Administrazioarekin zein erakundeekin itunak edo hitzarmenak izenpetu ere bai.
- i) Ordezkarria eta solaskidea izatea Eusko Jaurlaritzarekin, Euskal Autonomia Erkidegoa lurralde-eremu duten industria-ingeniartzaren lanbidearekin lotutako gaietan.
- j) Gobernu organoek erabakitzen duten beste edozein eginkizun, beti ere industri ingeniartzarekin zerikusia badute eta lege xedapenen aurka ez badaude.

2.– Kontseiluak, gainera, Euskal Autonomia Erkidegoko Administrazio Publikoaren, Foru Administrazioaren eta Toki Administrazioaren berezko eginkizunak bete ahal izango ditu, lanbide-jardunaren tutoretza edo koordinazioa xede dutenak, baldin eta administrazio horietako organo eskudunek hala xedatzen badute, Tituludun Lanbideei eta Profesionalen Elkargo eta Kontseiluei buruzko azaroaren 21eko 18/1997 Legean ezarritakoaren arabera.

7. artikulua.– Antolamendua.

Kontseiluaren gobernu organoak ondokoak dira:

- a) Osoko organoa eta gobernurakoa: Batza.
- b) Lehendakaritza organoa: Lehendakaritza.
- c) Administrazio organoa: Idazkaritza.

Kontseiluko Batzak behar beste batzorde era dezake Kontseiluaren jardun hoberako egokiak direla uste badu. Kontseiluak beti izango du batzordeak hartutako erabakien erantzukizuna.

8. artikulua.– Kontseiluaren Batza.

1.– Batza ondoko kideek eratuko dute:

- a) Arabako Elkargoa ordezkatzeko, bertako Dekanotza, Gerentzia eta Gobernu batzordeak izendatutako elkargokide bat.

b) Bizkaiko Elkargoa ordezkatzeko, bertako Dekanotza, Gerentzia eta Gobernu batzordeak izendatutako elkargokide bat.

c) Gipuzkoako Elkargoa ordezkatzeko, bertako Dekanotza, Gerentzia eta Gobernu batzordeak izendatutako elkargokide bat.

Elkargo bakoitzeko gobernu batzordeek ordezkariak izendatuko dituzte Kontseiluaren Batzarako. Ordezkariok, edozein unetan, berretsi edo ordezkatu egin daitezke, bilera jakin baterako ere bai, kasuan kasuko Elkargoko Gobernu batzordearen erabaki batez.

2.– Batzako lehendakaria eta idazkaria Kontseiluko lehendakaria eta idazkaria dira, hurrenez hurren.

3.– Batzaren eginkizunak dira estatutuotan berariaz beste gobernu organo bati esleitu ez zaizkion guztiak.

4.– Kontseiluko Batzak ahalmena du estatutuok garatzeko beharrezkoak diren interpretazio edo argibide xedapen guztiak emateko.

9. Artikulua.– Lehendakaritza.

1.– Lehendakaritza Kontseiluaren ordezkari ofiziala da eta Kontseiluko bileren lehendakaritza ere izango da.

Lehendakaritzak ontzat emango ditu bileren aktak, akordioak egikaritu eta betearaziko ditu, eta ordainketak aginduko ditu.

Lehendakaritzak bere eginkizunak eta Kontseiluaren ordezkaritza ofiziala Lehendakariordetzari eskuordetu diezazkioke, edo horrelakorik ez badago, Kontseiluko beste edozein kideri, baina ordezkaritza hori gai zehatz baterako izan behar da.

2.– Kontseiluko Lehendakaritza elkargoetako Dekanotzek beteko dute, txandaka eta urte biko agintaldietan.

Hala ere, Lehendakaritza ordezkatu behar denean Kontseiluko Batzak aho batez hala erabakitzen badu, Lehendakaritzarako beste elkargo bietako Dekanotza aukeratu daiteke, txandaren arabera Lehendakaritza bete behar zuena aukeratu beharrean. Azken Dekanotza horrek bere urte biko agintaldia bukatutakoan, hurrengo Lehendakaritza aurretik txandaren arabera Lehendakaritza bete behar zuen Elkargoko Dekanotza izango da.

Edozelan ere, Dekanotza batek gehienez ere lau urte kontsekutibotan bete ahal izango du Kontseiluko Lehendakaritza.

Lehendakaritza ordezkatzeko duen Lehendakariordetza bat ere egongo da, Lehendakaritza ez dagoenerako edo edozein arrazoiengatik bere kargua bete ezin duenerako.

Lehendakariordetza hurrengo txandan Lehendakaritza bete behar duen Dekanotzari egokituko zaio.

Lehendakaritza betetzen ez bada, Lehendakariordetzak beteko ditu Lehendakaritzaren eginkizunak estatutuek ezartzen dutenaren arabera postu hori bete arte.

10. artikulua.– Idazkaritza.

1.– Kontseiluko administrazio organoa Idazkaritza da.

2.– Idazkaritzari dagokio:

a) Kontseiluko langileen buruzagitza, langilerik egonez gero, eta Kontseiluko ekonomia eta administrazio zerbitzuak antolatzea eta zuzentzea.

b) Batzetako aktak egitea eta dagozkion ziurtagiriak ematea, Lehendakartzaren oniritziarekin.

c) Lehendakaritzak agindutako bileren deiak egitea.

d) Kontseiluaren aurrekontua eta urteko kontuak egitea, kobru eta ordainketak egitea, eta horiek kontabilitatean artez jasotzea.

3.– Kontseiluko Lehendakaritza hautatzearekin batera eta bi urterako ere, Idazkaritza txandaka egokituko zaie Elkargoetako Gerentziei.

Era berean, Idazkariordetza bat egongo da, Idazkaritza ordeztuko duena, ez dagoenean edo kargua betetzea eragozten dion edozein arrazoiengatik. Idazkariordetza hurrengo txandan Idazkaritza bete behar duen Gerentziari egokituko zaio.

Idazkaritza betetzen ez bada, Idazkariordetzak beteko ditu Idazkaritzaren eginkizunak estatutuek ezartzen dutenaren arabera postu hori bete arte.

11. artikulua.– Funtzionamendua.

1.– Kontseiluko Batza nahitaez gutxienez hiruhilabeterik behin bildu behar da, edo Lehendakaritzak egoki deritzon, edo Elkargoetako Gobernu batzordeetako batek hala eskatzen duenean.

2.– Idazkaritzak Batza baino 7 egun lehenago deituko ditu kideak —postaz, faxez, posta elektronikoz edo beste edozein jakinarazpen modu eraginkorren bidez—, eta deialdiarekin batera eztabaidatuko den gaien zerrenda igorriko die.

Epe hori murriztu egin daiteke Lehendakaritzak bilera presazkoa dela erabakitzen badu, eta hala dela egiaztatu behar du bileran bertan. Hurrengo bileran Batzak presazko izatea arrazoi gabetzat jotzen badu, hartutako akordioak ezeztagarriak izango dira.

3.– Gai zerrendan elkargoetako ordezkariak aurrerapen nahikoarekin proposatzen dituzten gai guztiak agertu behar dira.

Ezin da gai-zerrendan agertzen ez den gai bati buruzko erabakirik hartu. Salbuespena da organoa lehen deialdian biltzen bada eta bertaratutakoek aho batez erabakitzen badute gairen bat gai zerrendan presazko izaerarekin sartzea.

4.– Kontseiluaren Batza lehen deialdian eratutzat joko da bertako kideen gehiengoa bertaratu bada, eta bigarren deialdian eratutzat joko da lehena baino ordu erdi beranduago, bertaratutakoek kopurua edozein izanda ere. Batean zein bestean, bertaratutakoek artean Lehendakaritza edo Lehendakariordetza egon behar da eta, gutxienez, Elkargo bakoitzeko ordezkari bana.

5.– Erabakiak emandako botoen gehiengo soilaz hartuko dira. Berdinketarik egonez gero, Lehendakaritzak desegingo du bere kalitateko botoaren bidez.

Kontseiluko estatutuak eta horien aldaketak onesteko, zein diziplinazko auzien gaineko erabakiak hartzeko Batzako kideen botoen gehiengo osoa behar da, eta Elkargo bakoitzeko ordezkaritzetako kideren baten aldeko botoa ere bai.

12. artikulua.– Kideen eskubide eta betebeharrak.

1.– Euskal Autonomia Erkidegoko Industria Ingeniaritzaren Elkargo Ofizialak, Kontseiluko kide direnez gero, ondoko eskubideak dituzte:

a) Kontseiluan parte hartze aktiboa izatea, ahots eta botoarekin, dagozkion organoen bidez, erabaki, ekimen eta jarduera guztietan.

b) Elkargo bakoitzaren autonomia gordetzea bere lurralde eta eremuko gai, arazo eta eskumen eskusiboetan.

c) Kontseiluak elkargoak defendatu behar ditu, edozein instantziaren edo administrazioaren aurrean, lanbideari eragiten dion edozein gaitan, dagokion Elkargoak Kontseiluari hala eskatuz gero.

d) Kontseiluaren kontuen zein finantza eta ondare egoerari buruzko informazioa jasotzea.

e) Estatutuak aldatzeko proposamenen berri jasotzea, Kontseiluak horiek eztabaidatu eta erabaki aurretik.

f) Kontseilua disolbatzeko proposamenaren berri ere jasotzea, baita hori likidatzeko faseena ere, Kontseiluaren ondasun eta eskubideen gertatuko dena barne.

g) Kontseiluak, estatutuon arabera, hasi eta ebatzen dituen diziplina prozeduren berri jasotzea.

h) Kontseiluak eman dezakeen informazio eta zerbitzu guztiak jasotzea: lege, zerga eta lan aholkularitza, lanpoltsa, prestakuntza iraunkorra, etab.

i) Estatutuotatik ondorioztatzen diren beste eskubide edo eskumen guztiak eta, orokorrean, ezargarria den legediak ematen dituenak.

2.– Kontseilua osatzen duten elkargo ofizialen betebeharrak dira:

a) Kontseiluari elkargoen jardueren, egoeren, ekintzen edo ebazpenen berri ematea, beste elkargoek horiek ezagutzea komeni bada.

b) Elkargokideei Kontseiluaren ebazpenen, erabakien edo arauen berri ematea, kideei eragiten badiete edo interesgarriak badira.

c) Kontseiluko organoen ekitaldietara eta bileretara joatea, modu erregularrean eta unean unean, elkargoen ordezkarien bidez.

d) Kontseiluan bertan erabakitzen denaren arabera Kontseiluaren aurrekontua betetzeko laguntzea, eta horretarako ezartzen diren ohiko kuotak edo ez ohiko kopuruak ordaintzea.

e) Kontseiluaren eskura jartzea bere eginkizunak betetzeko behar dituen giza zein material baliabideak. Elkargoak hala egingo du txandaren arabera Kontseiluaren egoitza izatea dagokionean.

f) Kontseiluari lanbidearen defentsarako, duintasunerako, berau indartzeko eta horren intereserako behar dituen laguntza edo babes guztiak ematea.

13. artikulua.— Ekonomi erregimena.

1.— Kontseiluaren ekonomi baliabideak urteko aurrekontua betetzeko behar dituenak dira. Aurrekontua estatutuotan jasotzen diren xedeei jarraiki egingo da. Ekonomi baliabideak hiru jatorri izan ditzakete: Elkargoen ekarpenak, Kontseiluak beren jardueragatik jasotzen dituen dirulaguntza eta sarrerak, eta bere jabetzako ondasun eta eskubideen fruituak.

2.— Elkargoen ekarpenak urtetik urtera zehaztuko ditu Kontseiluaren Batzak bere aurrekontuan.

3.— Elkargoren batek ez baditu betetzen estatutuon arabera Kontseiluarekin dituen ekonomi betebeharrak, birritan eskatuko zaio gutun ziurtatu bidez. Elkargo bakoitzaren eskubideak erabat erabiltzeko derrigorrezkoa da ekonomi betebeharrak egunean izatea.

4.— Idazkaritzak urtero kontuen berri emango dio Kontseiluaren Batzari, horrek onar ditzan. Batzak hiru kide izendatuko ditu kontuen ikuskaritza egiteko eta dagokion txostena emateko. Hala ere, zeregin hori kontuen ikuskaritza egiteko ahalmena duen erakunde bati ere esle diezaioke.

14. artikulua.— Deontologia arauak.

Kontseiluak industri ingeniariaren deontologia-arauak egingo ditu, bere eginkizunetako bat da eta. Arauok, indarrean sartu aurretik, Araba, Bizkaia eta Gipuzkoako elkargo ofizialen onspena behar dute, eta behin hori jasota, elkargoetako araudian sartuko dira.

15. artikulua.— Diziplina araudia.

1.— Eragindako pertsona elkargoetako baten Gobernu batzordeko edo Kontseiluaren Batzako kidea bada, Kontseiluari dagokio diziplinazko ahala.

2.— Kontseiluaren Batzak prozedura bere kabuz edo Elkargoetako baten Gobernu batzordeak eskatuta hasiko du.

3.— Zehapen-prozeduraren instrukzioa eta ebazpena doakionaren elkargoaren estatutuetan ezarritakoari egokituko zaizkio.

16. artikulua.— Errekurtsoak.

1.— Kontseiluak berau osatzen duten elkargoen ekintza eta ebazpenen aurka jartzen diren errekurtsoen berri izan behar du, eta horiek ebatziko ditu. Hala dagokionean, Administrazio Publikoen Administrazio Prozedura Erkidearen 39/2015 Legea eta Sektore Publikoaren Araubide Juridikoaren 40/2015 Legea aplikatuko dira.

2.– Administrazio-zuzenbideari lotuta dauden Kontseiluaren ekintzak eta ebazpenak administrazioarekiko auzibide aurreko administrazio bidea agortzen dute, jurisdikzio hori arautzen duen Legean xedatutakoaren arabera.

17. artikulua.– Estatutuen aldaketa.

1.– Estatutuok aldatu egin daitezke hala eskatzen badu, gutxienez, Kontseiluaren Batzako kideen laurdenak edo elkargoetako Gobernu batzordeetakoren batek.

2.– Aldaketa eskabidearekin batera egiten den proposamena ere aurkeztu behar da, baita eragindako artikuluei eman nahi zaien idazketa ere.

3.– Estatutuak aldatzeko eskabidea horretarako deitutako Kontseiluko Batzan aurkeztu behar da, eta kide bakoitzari proposatutako testua helarazi behar zaio.

4.– Proposatutako aldaketa onesteko, Batzako kideen gehiengo osoa behar da eta, gainera, Elkargo bakoitzeko ordezkarietako baten aldeko botoa ere behar da. Aldaketa hori Eusko Jaurlaritzako sail edo departamentu eskudunek ere onetsi behar dute, eta Euskal Herriko Agintaritzaren Idazkarian ere argitaratu behar da.

18. artikulua.– Kontseilua disolbatu eta likidatzea.

1.– Euskal Autonomia Erkidegoko Industri Ingeniarien Kontseilua disolbatu egingo da hala erabakitzen badute Kontseilua osatzen duten elkargoetako bakoitzak, horretarako deitutako Ez Ohiko Batzar Nagusian.

2.– Kontseilua disolbatzeko erabakian Likidaziorako Batzorde bat eratzea erabaki daiteke. Batzorde horrek kide kopuru bakoitia izango du. Nolanahi ere, bai likidatzeko erabakian bertan, bai Likidaziorako Batzordeak, hori eratzen bada, geroago hartutako erabakian, likidatu ondoren geratzen diren ondasun edo ondare eskubideekin zer egin erabakiko da. Ondasun eta eskubideak Kontseilua osatzen zuten elkargoei esleituko zaizkie, eta horiek dagoeneko existitzen ez badira, lanbidearekin zerikusi zuzena duten elkarte, mutualitate, gizarte aurreikuspenarako erakundeei edo bestelako taldeei. Ondasun eta eskubideak esleitzerakoan, herri administrazioek emandako diru-laguntzen, funtsen edo baliabideen sistema erregulatzen duten arauak ezarritakoa betetzen dela zaindu behar da.

XEDAPEN GEHIGARRIA.

Estatutu hauetan aurreikusten ez denari dagokionez, tituludun lanbideei eta profesionalen elkargo eta kontseiluei buruzko azaroaren 21eko 18/1997 Legeak jasotako arauak, otsailaren 3ko profesionalen elkargoei eta kontseiluei eta tituludun lanbideen erregistroaren araudiari buruzko 21/2004 Dekretuak jasotako arauak, eta elkargoetako estatutuetako antolamendurako eta funtzionamendurako arauak ezarriko zaizkio Kontseiluari.